

Fasnacht 2017



Nachtschwärmer

So n'e Horror-Clown kunnt um dr Egge
Und wot uns schynbaar grad verschregge
Mir frooge iin, wie's iim so goot, es het uns interessiert
Är verzellt, är haigi nur – mit emme Samsung 7 delifoniert

Bald schiggt Zalando Päggli mit Droone
Diräggd dört aane wo mir woone
Mediamarkt, möcht Liefer-Roboter, die düüse dur s'Quartier
Bi mir dehai, isch alles bim Alte, do bringt mir d'Frau no s'Bier

In Tschernobyl, bim AKW
Mir händ das am Fäärnsee gsee
Jetz isch dört e Deggel druff, um d'Umwält vom Übel z'schütze
Mir sind sicher, so n'e Deggel, wurd au in Ziiri nütze

Im Rootlicht Quartier, ganz im Vertraue
Gseesch jetz am Boode so grieni Fraue
Die Griene im Rootlicht, passt no guet, isch sicher nid verfäält
Schliesslig het me, wie so oft, wieder rot-grien gwäält

Mache mir emol e Fescht
Verwöone mir denn unseri Gescht
Lactosefrey, ooni Gluten, vegan, biologisch und soo
I däm Fall gits halt numme Wasser, und das duur dr Britta-Filter gloo

Unseri Schugger, händ mir erfaare
Faare in dr Freizyt mit Schugger-Kaare
Als Geegeleischtig, händ si denn, e Tatsach wo keine kennt
Wäärend em Diensch, reegelmäässig, derfiir im Büro pennt

Wäär uns kennt, waiss, mir vier
Suffe gärn emool e Bier
Mir händ vernoo, Bier sig gsund, es het bitz Vitamin C
Gsundheitsbewusst, wie mir sind, suffe mir jetz mee

Mir vier, das passt wunderbaar
Jasse gärn, das isch doch glaar
Undenuffe, obenaabe, e Slalom ka's au syy
Hauptsach isch, mir wänd das soo, isch kai Trump-f derbyy

An dr Ski-WM in Sankt Moritz
Flitze si obenaabe wie dr Blitz
So schnäll wie meeglig dunde syy, nur das zellt, das isch gspunne
So betrachtet, hätti doch, d'Fäärnsee Kamera gwunne

Wenn me an d'Fuessball EM dänggt
Dänggt me an Löw, wo in d'Hose länggt
Me het denn driber spegguliert, är miech das wäg em Stress
Äär het denn d'Hand an d'Naase ghebt ... chlii stingge muess es

Wottsch au by uns bänggle?
Uff www.vsg-basel.ch erfahrsch meh!

